

**ПОСОЛСТВО СВЯЩЕННОГО СІНОДУ
ПРАВОСЛАВНОЇ ЦЕРКВИ В ЧЕСЬКІХ ЗЕМЛЯХ І В СЛОВАКІЇ**

РОЖДЕСТВО ХРИСТОВЕ 2021

Духовны отцёве, братя і сестры

Христосъ раждається!

У Віфлеємі посеред ночі – в часі, коли є тма найвекша – засвітило велике світло і зазвучав міцний голос ангела: *«Не бійте ся! Оголошую вам велику радість – в місті Давіда народив ся вам днесь Спаситель»*¹ (Лк 2, 10-11). Тот голос озывать ся і теперь, в часі неістоты запричіненім пандемієв, жебы знова приніс людям світло надії, святочне стишіня, духовну радість.

Дакотры з нас ся може будуть намагати скрывать своє знепокоїня і страх звычайным способом – традицнов рождественнов атмосферов, забавов, дарунками. Далшы будуть из-за «знаків» doby, котру переживаєме, вытігати апокаліптічны пророцтва і вызывати к релігійному фундаменталізму ці екстремізму. Но вшыткы люде сьме почас Рождественных свят покликаны к чомусь іншому – сьме запрошены розкрыти про себе фундамент праздника Рождества Христового, скрывать в ангеловій вісти: *«Днесь ся вам народив Спаситель!»*

Каждоденно сьме дословно завалёваны множеством розмаїтых, многораз протистоячіх інформацій. Зато ходем на хвілю перестаньме слухати тых, што ся намагають выкликати паніку і бунтовати к розділію. Ходем на хвілю перестаньме обертати увагу на тых, котры ся намагають нашу неістоту схосновати про свое благо. Ходем на хвілю в тиху Рождественных свят перестаньме слідовати рух того світа і почуйме в своїм сердцю кликаня ангела, добру вість о спасі – голос самого Бога.

Наступны свята Рождества Христового нас інтензівніше як в інших роках ведуть к тому, жебы сьме приход Спасителя – воплощеной Божой любви на тот світ пережили як голосне кликаня переоцінити напрям свого жывота. Пандемія, котру переживаєме, не дотулила ся лем здравотництва, політики ці економіки – она ся дотулила, і очівісно позначила передовшыткым меджілюдьскы односины. Вызерать то так, же вшытко на світї проходить пробов – і ніхто з нас не є вынятком. Но скушеность многих христіаньских поколінь доказує, же мож обстати в будьякій пробі – з выналожінём властных сил і довіров у Божу поміч. Якраз того ся нам снажить припомянати і наступный празник.

Бог не спасив чоловіка «з неба» – Він зышов на землю. Пришов на тот світ, прожив людський жывот і Своім Крестом і Воскресінём чоловіка спасив. Св. Іоанн Златоустый говорить: *«Бог зышов не землю, чоловік выступив на небо. Смерть была знічена, рай ся отворив. Клятба была знята, грїх счезнув. Поблуджіня были стерты, зоступила правда. То, же Бог ся став чоловіком, перевышує каждую надію і обчекованя. Народив ся в тілі, жебы нас зновузродив у Дусі. Народив ся як Сын жены, жебы з нас зробив дітей неба.»*² Чім веце ся соєдиняєме з Богом, тым веце розумиме, як міцно нас любив: аж так, же Сам ся став єдным з нас – чоловіком. З Ним ся учіме любити і одпуцати докінця своїм неприятелям.

¹ Не бойтеся: се бо благовесте вамъ велика радость велию... яко родиша вамъ днесъ спс... во градѣ дѣвовѣ.

² Собраны списы. Том 12, книга 2, проповідь 34.

Нихто і ніч не може нам одняти любов Хрістову. Людське тіло мож окліщити в слободі рушаня, але людська душа є слободна, і покля буде хотіти, все найде способ, як привітати новонародженого Хріста в яслях свого сердця – на місці, де ся одбывать каждая визначна стріча.

Приход Хріста на тот світ приніс радість вшыткым людям – но што значів про Нёго? Пророк Ісаія о тім говорить: *«Він взяв на Себе наші гріхы і ніс наші болі – і мы думали, же є ранений, караный од Бога і одвергнутый. Но він був язвений за наші гріхы і мучений за наші беззаконства. На нім кара, котра нам принесла мір, і ёго ранами мы были выздоров-лены»*³ (Ісаія 53, 4-5).

Якраз зато св. Григорій Палама выголошать: *«Не єстvue ніч, што было бы чудотворніше і цінніше як яскыня і яслі, дітяча купіль і пелены – бо ізо вшыткого, што Бог одколи сотворив, не є нічого, што было бы Божественніше або хосенніше як Рождество Хрістове»*⁴.

Хрістос не пришов на світ, жебы приніс дяку нову ідеологію або основав нову релігію. Він пришов, жебы нам вказав новый способ жывота. Жыти про другого, жыти в сполоченстві – то є Ёго заповідь. Покля Го зохабиме знова народити ся в наших сердцах і запалити в них огонь любви, з віфлеємской яскыні знова засвітить світло – світло надії на перемену світа к ліпшому через перемену нас самих.

Няй нам вшыткым Бог із Своёй доброти дарує духовні богато прожыти праздник Рождества Хрістового і Своёв благодатёв най благословить Новый рік 2022!

† **Растислав**

архієпіскоп пряшівський,
метрополита чеськых земель і Словакії

† **Михаїл**

архієпіскоп пражський і чеськых земель

† **Сімеон**

архієпіскоп оломовцко-бырняньський

† **Георгій**

архієпіскоп михаловско-кошіцькый

† **Ісаія**

єпіскоп шумперський

³ Сёй грѣхѣ на́ша но́ситъ ѿ ѿ на́съ болѣзньдетъ, ѿ мы вѣѣніхомъ сѣго быти въ тѣлѣ, ѿ въ ѣзвѣ ѿ бѣга, ѿ во ѿсловленіи. Тѣи же ѣзвѣнъ бысть за грѣхѣ на́ша, ѿ мѣченъ бысть за беззакѣнїа на́ша: наказанїе мїра на́шегѡ на нѣмъ, ѣзвѡю сѣгѡ мы ѿцѣлѣхомъ.

⁴ Проповідь на Рождество Хрістове.